

交河縣志卷十

民國四年重修

雜稽志

事畧

交河名縣肇自北金然上自唐虞下至前清歷四千餘載其中爲國爲郡爲邑時而分隸時而併入時而建侯時而移治事蹟亦浩繁矣而舊志缺而弗載實屬譎陋今採之正史及各志乘凡與交邑有關者列爲事畧若朝政大端建廢移治河防兵劫徭役等一一採之斯亦一治一亂之考鏡也志事畧

戰國

張儀相秦北說燕王曰今趙王已入朝効河間以事秦大王不事秦秦驅趙而攻燕則易水長城非燕有也燕王請獻常山

之尾五城以和 史記張儀傳

赧王四年 趙武靈王十五年 張儀說趙割河間以事秦

赧王三十一年燕大敗齊師樂毅部趙師以收河間 通鑑

秦始皇二十六年分天下為三十六郡以河間渤海屬上谷郡

秦文信侯欲攻趙以廣河間甘羅為文信侯說趙王曰燕秦所

以不相欺者無異故欲攻趙而廣河間也今王齎臣五城以

廣河間秦願與強趙以伐弱燕趙王立割五城以廣河間秦

果與趙攻燕得上谷三十城 史記甘羅傳

漢

高祖既定天下命選能引關蹶張材力武猛者以為輕車騎士

材官樓船常以秋講肄渤海肄樓船河間肄車騎

漢書地理志阿武景城為侯國

文帝二年始立河間國

成帝鴻嘉四年河溢渤海清河信都諸郡河隄都尉許商與丞相史孫禁共行視圖方畧禁欲決平原金隄間開通大河令入故篤馬河水道浚利可乾三郡水地又省吏卒治隄許商以爲古說九河之名有胡蘇徒駭鬲津今見在成平東光鬲界中自鬲以北至徒駭相去二百餘里今河雖數移不離此域孫所欲開者在九河南篤馬失水之迹處執平夷旱則淤絕水則爲敗不可許公卿皆從商言

漢書河渠志

東漢

更始末光武徇河北耿弇與寇恂合漁陽兵擊破王郎定涿郡鉅鹿中山清河河間凡二十二縣

耿弇傳

光武自南宮北渡滹沱河至信都使馮異別收河間兵還破王

郎馮異傳

光武建武二年遣漢忠將軍王常北擊河間漁陽平諸屯聚王常傳

明帝永平十五年四月封皇子恭為鉅鹿王黨為樂城王帝親定其封域裁令半楚淮陽馬后曰諸子數縣於制不亦儉乎帝曰我子豈宜與先帝子等歲給二千萬足矣通鑑

安帝時河間人尹次坐殺人當死次兄初詣官求代其命因自縊尚書陳忠遂議活次後應劭追駁以為非應劭傳

安帝時河間男子趙騰詣闕上書指陳得失帝發怒遂收考詔獄結以罔上不道楊震上疏救之曰臣聞堯舜之世諫鼓謗木立之於朝殷周哲王小人怨詈則皇自敬德所以達聰明開不諱博採負薪盡極下情也今趙騰所坐激訐謗語為罪



與手刃犯法有差乞為虧除全騰之命以誘芻蕘輿人之言

帝不省騰竟伏尸都市

楊震傳

順帝永建五年封濟南悼王廣弟文為樂城亭侯

見濟南傳

質帝本初元年桓帝即位九月戊戌使司徒持節之河間以太

牢祠樂成陵

通鑑

桓帝建和二年正月大赦賜河間王政黃金百斤

本紀

永康元年以河間博陵比豐沛

本紀

靈帝建寧二年正月迎董貴人於河間三月尊為孝仁皇后居

永樂宮拜其兄寵為執金吾兄子重為五官中郎將九月寵

矯永樂太后屬請下獄死

通鑑董后河間人

中平二年於河間買田宅起第觀

通鑑

中平五年六月帝欲北巡河間舊宅冀州刺史王芬謀以兵邀

劫誅諸常侍黃門因廢帝立合肥侯事覺芬自殺通鑑

中平六年五月大將軍何進奏孝仁皇后交通州郡請遷宮本

國奏可董太后憂怖暴崩通鑑

中平六年七月庚辰孝仁皇后歸葬河間慎陵本紀

蔡衍為冀州刺史劾奏河間相曹鼎贓罪千萬鼎者中常侍騰

之弟也騰使大將軍梁冀為書請之衍不答鼎竟輸作左校

乃徵衍拜議郎符節令蔡衍傳

獻帝建安九年十月曹操之圍鄴也袁譚復背之畧取甘陵安

平渤海河間攻袁尙於中山尙敗走故安今易州易縣南從袁熙譚

悉收其衆操責譚負約然後進討譚拔平原走保南皮臨清

河而屯操入平原畧定諸縣通鑑

十年正月操攻南皮袁譚出戰士卒多死出走追斬之通鑑

十八年夏以冀州河東等十郡封曹操爲魏公

### 曹魏

太祖征關中田銀蘇伯反河間銀等旣破後有餘黨皆應伏法

長史國淵請不行刑從之賴淵得生者千餘人

國淵傳

### 晉

武帝時河間有男女相悅許相配適而男從軍積年不歸女家更以適人女不願行父母逼之而去尋病死其夫戍還問女所在至塚哭之哀不勝情遂發塚開棺女卽蘇因負還家後夫聞詣官爭之郡縣不能決以讞廷尉奏以精誠之至感於天地不得以常理斷請還開棺者

搜神記

懷帝永嘉四年劉聰僭號封其子易爲河間王

劉聰紀

劉曜將東救蒲坂懼張駿揚難敵襲長安遣其河間王述發氏

羌之衆屯於秦州

劉曜紀

石勒時章武人王脊起兵於科斗壘擾亂河間諸郡勒以張夷爲河間太守率步騎三千以鎮靜之

石勒紀

河間人沐堅石勒時監作水田御下苛虐百姓怨恨乃爲堅形共以茅刃斫刺咒令倒斃堅尋得疾若被痛割遂死

石宏以石虎子宣爲冀州刺史封河間公

石宏紀

苟永晉苟晞之族人仕石趙爲河間治中是時天下大亂河間久被攻戰盜賊數起流人四十萬並集郡內永到官卽計安撫其願留者使吏賦以土田給之耕牛有欲歸者慰喻而遣之徐招降盜賊數歲以後戶口日增

成帝咸康四年趙石虎伐慕容皝進逼棘城皝懼欲出亡立菟太守河間劉珮曰今強寇在外衆心恟懼事之安危繫於一

人大王此際無所推委當自強以厲將士不宜示弱事急矣  
臣請出擊之縱無大捷足以安衆乃將敢死士數百騎出衝  
趙兵所向披靡斬獲而還於是士氣自倍

通鑑

慕容皝以渤海人爲興集縣河間人爲寧集縣廣平魏郡人爲

興平縣東萊北海人爲育黎縣吳人爲吳縣並隸燕國

慕容皝紀

穆帝永和六年九月燕王雋南徇冀州取章武河間以慕容評

爲章武太守封裕爲河間太守

通鑑

慕容雋封其弟徽爲河間王

通鑑

秦遣黃門郎石越聘於燕太傅評示之以奢欲以誇之富盛大

傅參軍河間劉靖言於評曰越言誕而視遠非求好也乃觀

釁也宜耀兵以示之用折其謀今乃示之以奢益爲所輕矣

評不從

通鑑

孝武帝太元八年燕使慕容垂鎮慰河北

太元十一年慕容垂稱帝定河北州郡

太元十七年慕容垂自魯口在饒陽縣界如河間通鑑

太元十八年燕王垂立子熙為河間王隆安二年慕容盛立

以熙為河間公通鑑

安帝隆安元年魏主珪罷中山之圍就穀於河間督諸郡義租

通鑑

北魏

孝文帝太和十五年分置州郡

太和二十二年發冀定瀛等州兵以伐齊

宣武帝延昌四年六月沙門法慶以妖術惑眾反於冀州殺阜

城令瀛滄震駭元遙討之

明帝熙平二年幽冀滄瀛皆饑遣使巡撫開倉賑恤

莊帝永安元年河間邢某率河北流人萬餘反於北海進攻濟南德棣皆驚奸民四應明年二月始降而斬之

### 東魏

孝靜帝天平元年令瀛滄幽青四州之境煮鹽置竈

按食貨志滄州置竈一千四百八十四瀛州置竈四百五十二交河隸竈籍當肇端於此

### 宋

孝武大明元年中水自河間割度廣州郡

地理志

大明七年僑立河間郡樂成成平屬焉

地理志

### 後魏

孝明帝孝昌三年二月詔燕趙經寇亂有能輸粟入瀛定者官

斗二百斛賞一階粟畢授官 本紀

北齊

文宣帝天保八年議徙瀛冀定無田之人於幽州范陽寬鄉以

處之謂之樂遷

隋食貨志

廢帝乾明元年夏冀趙瀛滄等州蝨水傷稼遣使分塗贍恤

隋

文帝仁壽元年六月詔廢太學及州縣學河間劉炫切諫不聽  
煬帝大業四年詔發河北諸郡男女百餘萬開永濟渠引沁水  
南達於河北通涿郡民死於役者過半

大業十一年春上谷賊王須拔等北連突厥南寇燕齊河間  
格謙號燕王渤海孫宣雅號齊王殺奪橫行民無安堵故於  
二月詔村隄皆築城今各縣村莊許築圍牆由此起例



大業十三年竇建德稱長樂王入河間定都樂壽今獻縣河北

盜賊蠡起縣境騷然

大業末涿郡守解絢將兵討竇建德於河間戰死解絢傳

唐

高祖武德二年竇建德在聊城生擒宇文化及檻車載之河間

斬之隋書化及傳

太宗貞觀元年分天下為十道以河北道治魏郡領瀛冀滄德

諸州

貞觀十四年二月乙未詔求劉焯劉炫之後本紀

中宗嗣聖十三年契丹孫萬榮攻陷冀州又攻瀛州河北震動

玄宗開元十六年河北大水以宇文融充九河使請墾九河故

地為稻田事迄無成民皆怨詈宇文融傳

開元二十六年奉勅建縣鄉學塾自仁壽元年詔廢州縣學至此始建

天寶十四年恆山郡太守顏杲卿敗何千年執之克趙鉅鹿廣

平清河河間景城樂安博平博陵上谷文安信都魏鄴十四

郡本紀

是年安祿山反河間司法李奐等殺祿山所置官吏推平原

太守顏真卿為盟主起兵討賊河北諸郡皆應之

天寶十五年賊將史思明攻陷常山太守顏杲卿死之河間李

奐景城李暉皆死於河東諸郡聞風瓦解百姓流離

肅宗至德元年六月李光弼圍博陵未下聞潼關不守解圍而

南與郭子儀皆引兵入井陘留常山太守王侑將景城河間

團練兵守常山

通鑑

至德二年祿山死史思明以所部來降滄瀛德等州復歸河

北

乾元元年思明復反陷魏州徵調無已民不聊生

是年置觀察使

按交河有察院行臺舊址應起於此宋元皆因之

代宗大曆十年魏博節度使田承嗣反陷瀛滄衛冀李寶臣攻

滄州吳希光以瀛州降民多逃散

七年河北大旱而且兵革不息亦危急存亡之秋也

德宗建中三年禮儀使顏真卿奉治武成廟如月令春秋釋奠

詔考定古今名將可醜享者凡六十四人圖其形中山公王

峻與焉

禮樂志

建中四年十二月回紇三千人發河間而南輜重首尾四十

里

通鑑

貞元五年分景城弓高為景州刺史

是年程日華參軍李宇入朝願析東光景城二縣置景州且

請刺史河朔刺史不廷授者幾三十年帝嘉其忠以徐申為

景州刺史

程日華傳

穆宗長慶二年春正月盧龍兵陷弓高既平復於弓高置景州以弓高東光臨津南皮等縣屬之

宣宗大中九年夏閏四月詔州縣作差科簿

僖宗乾符三年令天下鄉村各置弓刀備盜

是時王仙芝黃巢皆起河北作亂於

四方

昭宗景福元年復於弓高置景州

昭宣帝天祐三年劉守文遣兵攻貝

今清河縣

又攻冀州拔蓨縣

今景

州進攻阜城瀛滄告警

五代

後唐天祐九年楊師厚急攻棗強拔其城屠之復與賀德倫圍

褚縣而史建唐率百騎乘夜縱火大譟梁王燒營遁去瀛滄  
景德諸州逋逃殆盡

後晉天福元年契丹立石敬瑭爲晉皇帝敬瑭遂以幽涿薊順

瀛莫等十六州爲賂

此時交河尙名樂壽屬深州饒陽郡不在十六州之內

晉高祖天福四年八月以馮道守司徒兼侍中詔中書知印止

委上相由是事無巨細悉委於道帝嘗詔以軍謀對曰征伐  
大事在聖心獨斷臣書生惟知守歷代成規而已帝以爲然  
道嘗稱疾求退帝使鄭王重貴詣第省之曰來日不出朕當  
親往道乃出視事一時寵遇羣臣莫與爲比

通鑑

晉出帝開運元年三月契丹自澶州北分爲兩軍一出滄德一

出深冀而歸所過焚掠方廣千里民物殆盡

通鑑

開運二年護聖都指揮使杜漢徽以所部戍深州破契丹於

樂壽殺獲甚衆宋史杜漢徽傳

後周顯德三年敕漳河以北鄉村並許鹽貨通商逐處有鹽地

任人煎煉但不得踰漳河入不通商之地

按貧人刮鹽熬鹽自古已然乃至罪為私煎沿為厲禁徒

飽商橐亦獨何歟

宋

太祖建隆三年命馬仁瑀守瀛州以拒契丹各縣境十室九空

半由遷實

太宗雍熙三年冬契丹數萬騎來侵瀛部署劉廷讓與戰君子

館今河間肅寧地廷讓大敗脫走李繼隆退保樂壽劉廷讓傳

淳化四年詔河北屯田用實軍廩

真宗景德元年契丹攻滄州又攻瀛州復侵冀州大寇澶州帝

自將禦之民間困苦難言

仁宗慶曆八年始置高陽關路以瀛莫冀滄永靜乾寧等屬之

按高陽關卽今河間府城

神宗熙寧元年河決冀州棗強埽又溢瀛州樂壽埽侵害民田  
熙寧二年免河北歸業流民夏租九月出內庫緡錢百萬糴  
河北常平粟

熙寧六年偪行青苗新法

熙寧七年正月程昉言深州開引滹沱水淤田及開回胡蘆  
河并回滹沱河下尾

河渠志

元豐四年夏築河隄自大名至於瀛州派夫騷擾

徽宗大觀二年以高陽關路升爲河間府滄州南皮隸焉

宣和六年河北盜高托山山東盜張仙聚衆剽劫民不安生

欽宗靖康二年正月割河間三鎮與金詔兩河民降金民不從

四月金劫二帝北去宋南渡通鑑五月康王卽位於南

京改元建炎遣馬忠趨河間以擊金軍 八月金人盡陷河

北州郡河間諸屬皆闕母所下

金

太宗天會七年宋建炎三年析河北爲東西路東路於河間置總管

府 九月下髡髮令易服色

天會八年宋建炎四年金立劉豫爲齊帝都大名府紀元阜昌河

間滄景皆屬之

天眷三年宋紹興十年始置屯田軍交河各屯名蓋起於此

世宗大定七年改交河鎮爲交河縣屬獻州方輿紀畧

大定十八年獻州人殷小二等謀叛伏誅



章宗泰和六年宋開禧二年定制凡漕河所經之地州府帶提控漕

河事縣官則帶管勾漕河事若吳橋東光將陵南皮交河等

縣皆管勾漕河事

衛紹王至寧元年宋嘉定六年蒙古圍金燕京拔河北河東諸郡克

觀州刺史高守約死之又破清滄景獻河間以徇

按此時交河隸獻州獻州破交河亦潰矣

宣宗真祐二年宋嘉定七年金及蒙古中平都解嚴五月金徙都汴

真祐四年宋嘉定九年清州防禦使張開率所部取河間府及滄

獻二州十有三縣交河在內

興定元年宋嘉定十年蒙古攻金觀州今東光縣境惶亂

興定三年宋嘉定十二年金河北地俱失縣境隨陷

興定四年宋嘉定十三年封河間招撫使移刺衆家奴為河間郡公

以獻蠡安深河間肅寧安平武強諸州縣隸之

宋元通鑑

元

太祖八年帝與皇子拖雷爲中軍取河間府滄景獻深邢蠡等

二十八州郡

本紀

太宗八年

宋瑞平三年

括民戶定租稅

按元年己丑始命河北漢民計戶出賦以耶律楚材主之  
至是乃具章程

憲宗二年

宋淳祐十二年

分漢地封宗室交河屬河間路獻州

世祖中統二年初立勸農司以程邃崔斌等爲濱棣濟南河間

勸農使

至元二年交河省入樂壽尋復

至元二十年正月詔停燕南河北山東租賦

續文獻通考曰元以州次於郡至元二十年更定其地五萬戶之上者爲上州三萬戶之上者爲中州不及三萬戶者爲下州於是升縣爲州者四十有四縣戶雖多附府路者不改又元史曰至元三年合併江北州縣六千戶之上者爲上縣二千戶之上者爲中縣不及二千戶者爲下縣按樂壽交河爲中縣獻州則爲下州蓋亦分見羸合見絀也其時官制上州爲尹中下則爲知州縣尹之秩自從六至從七亦因地爲差云

英宗至治元年五月修滹沱河隄

本紀

泰定帝泰定二年閏正月修滹沱河堰

本紀

致和元年九月遣使分行河間保定等路括民馬

順帝至正二十一年命孛羅帖木兒於保定以東河間以南從

便屯種

本紀

至正二十七年明大將徐達率師徇河北地連下畿南諸郡副將常遇春陷長蘆扼直沽水陸並進

元初牧養馬駝分布郡縣而宿衛近侍之人多役民放牧百害蠶起大德時始責州縣正官監視蓋暖棚團槽櫪以牧之至治初復散之民間其害如故河間路守臣屢言之中書平章政事張珪議復大德之制帝不能從

張珪傳

明

太祖洪武元年十月改河間路爲府屬河南分省 詔京師設

漏澤園天下府州縣於近城隙地立義塚

洪武二年令郡邑設行太僕寺置牧地責民間大戶養馬

洪武四年交河改屬河間

洪武五年詔天下郡縣立孤老院以養貧民復改名曰養濟

院縣治西南隅有養濟院舊址

洪武八年奉部劄普立社學頒發卧碑

洪武九年六月改行中書省為承宣布政使司於是河間府屬皆隸布政司

洪武十年交河省入獻縣

洪武十一年浚滹沱河湯潛菴明史稿

洪武十三年燕王棣之國七月詔天下學校諸生給廩膳

生員補廩食餼始此改獻州為獻縣改直隸河間府交河縣

洪武十四年交河知縣周以仁剏建縣治儒學是年頒五

經四書於學校

洪武十五年始設行太僕寺置牧地現城西有牧地村

多濟集卷一 十一  
洪武二十二年交河知縣武聰修新橋驛

洪武二十九年交河知縣張士廉修富莊驛

惠帝建文元年燕王靖難兵起河北逃散幾無子遺

建文三年盛庸及靖難兵戰夾河斬燕將譚淵明日再戰互有勝負忽東北風大起燕兵乘風縱擊庸大敗追奔至滹沱

河庸力走得脫遂還德州

廣巢記

成祖永樂二年遷大姓實畿輔邑內居民多由外省遷至土著甚少詔開閒田永不起科

永樂九年引滹沱水灌田六百餘頃

河渠志

永樂十年冬十一月吳橋東光興濟交河天津等處河水決隄壞民田舍

永樂十三年以渤海鹽藪私販撓法特遣御史一員巡視河

間私鹽

永樂十八年建太僕寺行臺令養馬人二年一算駒

永樂十九年遷都北京議北征軍餉各縣派發民夫

英宗正統二年始令郡縣募民壯

今民壯之設始此

景帝景泰二年知縣楊貴重修縣治

英宗復位天順七年知縣張廉增修儒學

孝宗宏治十年知縣李泰增修儒學

武宗正德六年流賊劉六等寇交河遂掠泊鎮

按劉六等寇交河時遙見城上有赤面大漢持刀往來咸驚異曰城中有神不可犯卽率衆遠遁城中賴以保全因有在賊中逃出者言之甚詳是以城樓有關帝廟

正德八年知縣李天敘增修城池

世宗嘉靖二十年流寇恣掠兵部馬不敷用五月遣太僕寺丞齋官銀分派州縣買俵解大馬民多不堪

嘉靖二十二年增設州縣民壯額

嘉靖二十七年知縣崔雲鶴重修儒學 有碑記

神宗萬曆七年張居正惡人講學矯詔毀天下書院

萬曆十六年知縣馬中良初修縣志

萬曆十九年知縣馬中良重修儒學 有碑記

萬曆四十五年立知縣党中疇生祠 有碑記

熹宗天啟五年七月壬戌詔毀首善書院八月壬午並毀天下

### 講學書院

莊烈帝崇禎九年七月清兵入寶坻連下近畿州縣

崇禎十五年閏十一月清兵由薊州下畿南郡邑多不守



崇禎十七年三月流賊李自成犯京師丙午皇城陷餘賊經  
富莊驛過

清

太祖順治元年四月李自成奔山西五月清定京師馳文到縣  
招撫官民縣境安堵如故 是年劉趙二賊首率羣賊寇交  
河已及城下城內極力拒守遂掠附近村莊而去

縣志

順治二年六月下薙髮令易服冠

順治四年飛來賊三百餘人入城搶掠放獄而去

舊志

是

年建知縣班璉生祠

順治十三年知縣王基昌重修 文廟

聖祖康熙二年令鄉會考試停止八股文以策論表取士明年

甲辰科爲始

康熙七年命鄉會試復以八股文取士

康熙八年六月上諭自後圈占民間田房永行停止其今年

已圈者悉令給還交河東北地方被旗人圈占者不少

康熙十八年加鹽引

康熙二十九年弛民間養馬之禁

康熙五十五年令民間買賣地畝隨輸課

世宗雍正元年部議將丁銀攤入田糧內雍正二年為始造冊

徵收

雍正二年定議分給各州縣官養廉養廉銀始此

雍正三年上丁祭 文廟始增太牢及祭器雍正通志州縣舊無太牢至是

始增及俎豆 籥舞諸器 是年奉行義倉社倉之法勸民積穀

雍正九年升天津衛為府以天津青縣靜海滄州南皮鹽山

慶雲七州縣屬之於是河間府祇領十一州縣交河次六

高宗乾隆四年特免額賦

乾隆六年知縣趙洪烈買地若干畝爲義學田

有碑記

乾隆十年飭有司月給孝子節婦糧

乾隆四十二年普免正供錢糧

乾隆五十年議准官備礮船一千二百隻交附近沿河之天津靜海等十八州縣分管多寡有差當經派撥青縣南皮交河吳橋東光等縣各六十隻

乾隆六十年萬壽賜千叟宴時畿輔內耆老與宴者共三千三百一十四人

仁宗嘉慶二年免正供錢糧 十二月賜高年頂戴

嘉慶十八年教匪竊起踞滑縣城畿南州縣戒嚴者旬日

憲宗道光二年正月申禁民間私藏烏鎗火器

道光二十六年奉減鹽引

文宗咸豐三年粵匪李開方林鳳祥由南竄至破縣城知縣孔慶銓父子殉難立有祠

咸豐五年命通行銅鐵當十大錢並鉛鐵制錢閏五月推行大錢鈔票

咸豐八年九月河間一帶土匪滋擾

咸豐十一年正月天河道孫治專辦天津河間兩府團練

穆宗同治七年四月擒匪張總愚犯鄰境竄至御河以東知縣朱紹穀令闔邑團練在御河西岸築牆防守縣中得安闔邑爲立德政碑後又立去思碑

同治十二年六月楊家圈御河西岸決

德宗光緒二年知縣王錫琦重修 文廟

光緒九年天河道設長蘆義塾二十處於天河二府以仁命

名交河曰廣仁

光緒二十二年知縣周植瀛立義塾五處

一城裏一泊鎮一郝村一富莊驛一

高川

光緒二十七年知縣程龢重修瀛南書院為學堂

光緒二十九年知縣龔彥師修工藝廠

光緒三十年改求實學堂為高等小學堂

光緒三十二年令各州縣立巡警局

光緒三十三年立籌款局

光緒三十四年夏五月巡警傳習所自治局成立

是年令各州縣立勸學所

是年籌款局改收支處

宣統元年令各州縣立自治局並自治研究所

宣統三年令各州縣立警務教練所並立田房稅契處議參事會 是年革命軍起

民國

民國元年八月立保衛分局 是年裁撤各州縣汛官

是年秋收支處改理財所

二年十一月停止理財所田房稅契處均歸公署

是年取銷自治局 立禁洋煙局 取銷勸學所

三年正月取銷議參事會並取銷保衛分局

四年令各州縣立教育會旋改爲勸學所

是年十一月陽曆正月民國改稱帝國建元洪憲

五年二月陽曆三月取銷洪憲仍復民國

是年重修奎樓聖廟





雜稽志

祥異

傳曰天道遠人道邇似人盡人道不必問天道之感召否也  
然日月星辰之剝蝕水旱陵谷之變遷伊古歷史莫不詳書  
以故國運興隆則休嘉備至朝政溷濁則災害叢生交邑星  
分昴畢凡與分星有關者考之史冊若天文地理水旱凶荒  
悉著於篇志祥異

漢

文帝後二年七月火東行行畢陽環畢東北出而西逆行至昴

畢昴趙也

天文志

宣帝黃龍二年五月客星見昴分居卷舌東可五尺青白色炎

長三寸

天文志

元帝永光元年三月杪隕霜殺桑傷麥秋隕霜害稼諸路皆饑  
成帝元延元年四月無雲而雷有流星東行四面如雨下

嘉鴻四年秋渤海清河信都河水溢溢灌縣邑三十一敗官

亭民舍四萬餘

五行志

東漢

光武帝建武七年三月癸亥晦日有蝕之在畢五度

和帝永元六年三月濟北河間饑饉民多流亡

永元七年十一月丙辰火金水俱在斗流星入紫宮金火在

心皆為大喪三星合軫為白衣之會八年四月樂成王黨七

月樂成王崇皆薨

天文志

安帝元初三年十一月甲午客星見西方巳亥在虛危南至胃

昴

桓帝永康元年八月河濟大水

靈帝熹平元年夏霖雨七十餘日

熹平二年十月癸丑朔日有蝕之趙相以聞天文志

獻帝興平元年夏大蝗

建安二十二年大疫

晉

武帝咸寧三年八月河間屬寒冰大風拔木五行志

太康六年河間等六縣隕霜壞桑麥五行志

太康七年十一月丙辰四角獸見河間河間王顒獲以獻角

兵象也董仲舒以四角為四方之象後河間王數連作為亂

階殆其應也五行志

惠帝永寧二年十一月壬寅夜赤氣竟天隱隱有聲晉書本紀

趙石勒時滹沱泛溢衡山谷巨木僵拔東至渤海原隰之間皆

如山積石勒載記

燕慕容儁時樂城房淵生鹽如印形一日再長一日再消不失

其度葉落於淵輒有飛燕銜出之十六國春秋

燕慕容德時麟見於河間慕容麟以為巳瑞遂謀叛慕容載紀

北魏

孝明帝熙平二年九月瀛州暴風大雨自辛酉至乙丑是月冀

滄瀛三州大水

孝靜帝元象元年定冀瀛滄四州大水以上俱靈徵志

北齊

後主武平六年八月丁酉冀定趙幽滄瀛六州大水本紀

隋

文帝開皇五年瀛州秋霖大水其屬縣多漂沒民皆上高樹依  
大塚刺史郭衍親備舩楫并齎糧拯救之民多獲濟衍先開  
倉賑卹後始奏聞上大善之選授幽州總管郭衍傳  
開皇八年秋河北諸州饑遣吏部尙書蘇威賑卹仁壽二年  
秋河北諸州大水

唐

太宗貞觀九年閏四月丙寅朔日有蝕之在畢十三度

貞觀十三年乙丑有星孛於畢昴十二月壬申侯君集爲交

河道行軍大總管

天文志

高宗永徽五年六月河北大水滹沱盈溢損五千餘家

五行志

顯慶五年河北二十二州大旱

中宗神龍三年夏山東河北大旱草木枯焦道殣相望

玄宗開元元年七月滹沱溢五行志

德宗貞元元年河北大饑斗米千錢

穆宗長慶元年六月有彗星出於昴長一丈凡十日不見天文志

僖宗乾符四年四月壬申朔日有食之在畢三度天文志

宋

太祖開寶年五月大雨河決滄瀛大水千里幾無煙火五行志

太宗太平興國二年本紀作八月景城縣雹七月景城縣震死牛商

馮異五行志

八年河江漢滹沱及祁之資滄之胡蘆雄之易惡池水皆溢

為患本紀

至道元年七月癸丑有星出危色青白入羽林沒

雍熙元年六月河溢恩州烏欄隄又決冀州棗強隄北注瀛

七月又溢瀛州樂壽埽都水監丞李立之請於恩冀深瀛等

州創生隄三百六十七里以禦

河渠志

是年十二月癸卯瀛州地大震

五行志

真宗咸平元年十一月瀛州有雷

五行志

咸平五年二月雄霸瀛莫深滄諸州水壞民田

五行志

景德元年四月己卯夜瀛州地震

五行志

大中祥符六年八月瀛州嘉禾生知州馮守信以聞

五行志

仁宗景祐三年六月河北久旱遣使詣北嶽祈雨

嘉祐二年諸路江河決溢而河北尤甚徧野鴻噉

三年七月丁酉有星出危西南速行入濁

神宗熙寧元年七月甲申河北地震壞城郭廬舍瀛州尤甚民

訛言大水且至官撫之乃定是日再震復大雨

曾鞏瀛州修造記

哲宗紹聖元年樂壽縣麥一本兩穗或三穗五行志

徽宗政和七年瀛滄州河決死者百餘萬五行志

崇寧二年河北諸路皆蝗令有司酺祭勿捕及至官舍之馨

香來薦而田間之苗葉已無矣

高宗建炎四年十二月壬午太白與熒惑合於危

孝宗隆興元年金大定三年二月中都以南八路蝗

金

世宗大定十六年河北山東旱蝗

大定二十二年河間進嘉禾是冬無雪

章宗明昌元年正月河間進芝草嘉禾二月河間地生白毛

承安四年六月地震

宣宗貞祐四年河間大饑人相食



元

世祖中統三年八月河間等路隕霜害稼五行志

中統四年六月河間路蝗五行志

至元元年河間濟南相連大水五行志

至元六年獻淇滄清四州大水五行志

至元二十二年五月河間蠶災本紀

至元二十五年九月獻莫二州霖雨害稼豁免田租八百餘

石本紀

元貞二年五月河間之樂壽交河水六月交河雨雹九月樂

壽旱五行志

成宗大德元年八月河間旱樂壽交河疫死六千五百餘人本紀

大德六年四月河間屬縣蝗五行志

大德七年濟南河間等路水

大德九年三月獻莫清滄四州霜殺桑一百四十一萬七千

餘本壞蠶一萬二千七百餘箔

五行志

大德十年四月河間真定等郡蝗

武宗至大三年九月河間路獻嘉禾有異畝同穎及一莖數穗

者敕趙孟頫繪圖藏諸秘書

本紀

仁宗延祐三年河間濟南濱棣等處饑給糧兩月

本紀

延祐五年河間路大旱

五行志

延祐六年六月河間漳河水溢壞民田二千七百餘頃

五行志

泰定帝泰定三年河間屬縣饑並賑之

文宗至順元年六月河間獻景諸州蝗

本紀

至順二年三月獻景等八州俱有蟲食桑爲災四月河間屬

縣皆以旱不能種告饑五月大水以鹽課鈔四千錠賑飢民

四千五百戶 本紀

順帝至正元年春河間諸屬饑 五行志

至正二年河間路饑以鈔五萬錠賑之 本紀

至正十九年五月大蝗山東河南直隸京師飛蔽天日所落

坑塹皆平人馬難行民大飢都城銀一錠易米八斗

明

太祖洪武三年四月直隸永平河間皆大旱七月文星見

洪武四年河間旱 五行志

洪武二十一年八月壬戌至甲子天鼓鳴晝夜不止

惠帝建文元年七月燕王起兵風雲忽暗咫尺不辨少焉東方

露青天尺許有光燭地

成祖永樂五年保定河間饑

五行志

仁宗洪熙元年夏順天河間保定皆水

宣宗宣德六年渾河決河間州縣皆水

英宗正統六年七年河間各屬蝗

正統十四年順天保定河間諸路旱

以上俱見五行志

景帝景泰四年冬十一月至五年正月直隸山東皆大雪數尺人畜多凍死

天順元年五月丙戌彗星見於危若動搖者直隸大饑疫

天順三年四月順天河間真定保定連日烈風麥苗盡敗

五行志

憲宗成化十八年八月衛漳滹沱並溢

成化二十二年大有年夜雨晝晴

孝宗弘治二年七月大水

弘治七年真定保定河間三府饑

以上俱府舊志

正德六年河間保定二府同日地震

正德七年六月壬戌黑眚見河間順德及涿大者如犬小者

如貓夜出傷人有至死者

五行志

正德十四年大疫

是年六月朔夜河間見一星暫明如日

府舊志

世宗嘉靖三年六月順天保定河間蝗

五行志

秋大水

嘉靖七年四月四日五鼓見異氣如火光龍形自空垂地當

西南隅直立數刻方散

府新志

嘉靖十二年十月星隕如雨

嘉靖十九年河間大饑

府新志

嘉靖二十五年八月天鼓鳴

嘉靖三十三年春饑人相食夏雨雹如斗壞廬舍禾稼

府新志

神宗萬曆二年九月天鼓鳴

萬曆十五年八月天鼓鳴

萬曆十六年蝗飛掩日蝻子厚積數寸

萬曆十九年大饑

二十一年二十二年均有年

二十七年大饑

二十八年六月雨雹大如鵝卵小如棗栗害傷禾稼

三十五年黑陽山水決汎溢逆行陸地行舟壞民居宅

大饑

四十二年旱綿蟲寸長徧地黑色傷害田稼民饑

四十四年旱無麥秋後雨降七日方止壞民居宅

四十五年有年

四十六年有年

四十七年有年

四十八年旱蝗飛蔽日害稼民饑

熹宗天啟元年有年太白經天

二年有年

六年霖雨民田半收夏地震不數日復震

七年無麥

莊烈崇禎元年有年

三年霖雨

五年旱蝗飛掩日橫占十餘里樹葉禾稭俱盡

七年有年

九年旱至六月二十三日方雨田禾半收

十一年旱蝗害稼民饑

十二年旱蝗蝻大傷田稼民饑

十三年大饑民相食甚至父母食子妻妾食夫大疫

十七年三月大風霾黑沙蔽日連三日

清

太祖順治二年有年

四年蝗飛掩日落地厚尺餘禾稭盡食

七年旱至六月二十一日方雨二十六日雨雹大如鵝

卵小如棗栗人畜有傷死者又兼綿蟲食禾糧價騰貴

八年淫雨害稼



十年淫雨害稼

十一年黑陽山水決陸地行舟

十三年有年

十五年春旱天鼓鳴

十六年蝗傷稼民饑

十七年霖雨

聖祖康熙元年有年

二年綿蟲食禾

三年霖雨

四年春旱蟲災秋大水民大饑

五年彗星見數日方止三月初八日地震

六年大水害稼民饑地震

八年霖雨害稼

九年十年有年

十一年蝗傷稼閏七月十四日夜有白氣自西南向東北其疾如飛其聲如風

五十九年六月初八日地震

世宗雍正三年春旱六月大雨

八年九月十九日地震

九年四月望後日月色赤凡七晝夜

十年八月十五日隕霜

高宗乾隆八年九月己亥彗星見

十四年八月桃李華

二十八年五月朔未時日食彗星晝見

四十年旱大有秋

四十一年有年

五十六年旱蝗

五十七年秋禾未成野多餓莩

五十八年有蟲未成災

六十年旱蝗六月二十一日地震

仁宗嘉慶元年大有年斗穀京錢不過百五十文紅梁斗百文

二年大疫

十四年元旦夜黑氣一道自西北抵東南長竟天

二十五年正月二十四日月中有星七月二十五日天

鼓鳴

宣宗道光元年二月朔日月合璧五星聯珠七月大疫流行

二年麥豐收七月大水詔緩四十八州縣徵

八年有年秋地震

十二年七月初一日隕霜傷稼

十三年麥有秋

十七年秋旱歉收緩徵

二十四年九月二十七日未時天鼓鳴

二十五年九月初七日有星入月

文宗咸豐元年有年

三年四月初四日午刻日旁黑氣四圍摩盪形成圓暈

七年春大饑多餓殍六月始雨秋有年

十一年八月丁巳朔日月合璧五星聯珠

穆宗同治元年六七月大疫中元夜流星無數散入西南方

三年旱疫癘流行

四年五六月星晝見

十一年五月朔日食

德宗光緒二年八月十一日隕霜有蟲盡凍死稼復蘇熟

三年旱無年糧米昂貴疫癘流行

四年春大饑斗粟千錢饑疫兼臻民傷十四免徵施賑

秋大熟田禾自生

八年十月二十二日地震二十五日復震

十年正月二十六日夜地震十二月二十五日夜地復

震

十一年十月二十日申刻西北聞雷二十二日夜流星

如織

十四年五月初四日未刻地震

二十五年旱田稼半收

三十四年旱六月始雨田稼半熟

宣統元年有年

二年有年秋八月彗星見於正東

三年有年春月彗星見於西北

民國

民國元年大水不盡有年

二年有年

三年有年九月大雨數日方晴十二月十九日大雪

四年七月間旱蝗飛則蔽天落則徧野所至之處稼禾皆空後蝗子出爲害更甚

雜稽志

陵墓

周禮有冢人墓大夫之設皆辨其兆域而爲之圖古人之重夫墓也由來久矣况武王代殷封比干墓子路過墓則式是人於古墓未有不肅然起敬者古墓之隸於交境有知其姓氏者有不知其姓氏而俗稱爲將軍墓王墓者疑以傳疑信以傳信俟好古者有所考鏡而已志陵墓

帝子墓一座 在東傅莊東南相傳已久不知何朝

見採訪册

古塚一座 在城東北黃遞舖高家屯村西南隅相傳爲丁尙書墓

採訪册

古塚一座 在城北二十五里王將軍莊村北

古塚二座 在城東北七十里高川西南二里許後高龍華村

東二里大塚居西北小塚居東南相距七十餘步不知何時之塚據前高龍華張氏族譜載有塚南祭田若干畝遠近均呼爲塚是古塚無疑

古塚一座 在城東北九十里老莊子村南已失故址光緒間適有看葬地點穴者及啟壙時見有一石椁椁前有石桌桌上有古磁祭器十餘件羣相駭異將祭器運出現存王氏家仍將穴覆平此屬古塚無疑

古塚二座 在城東九十里賈家窪東村東東西對峙中隔一道高三四丈圍七八畝時代姓名均失考

漢

貞王建墓 在縣東北九十里建塚村西高四丈餘圍五畝許  
二董塚 在城東北三十五里也村正東三里許南北相



距過半里北塚甚鉅前方陡峻後漸漫平歷數千年尙高極

二丈南塚微小而低形亦相同下通以隧道任邱縣任光墓碑記阿陵侯墓

縱若干步廣若干步司空墓在其右相去若干步中為隧道達焉若異宮而入侍者蓋古者從葬之禮如此

俗呼為董塚子前清光緒七八年間村人掘土誤透泉宮得

悉其中磚砌小圓門委曲多處旋為築起南塚掘出古磚甚

多形式不類近代物磚散存於附近村中

宋

劉將軍墓

在縣北四十里曹家村東南里許

金

杜將軍墓

在縣北四十里曹家村東南里許

按舊志載劉解鎮杜將軍墓未詳其人今據採訪冊杜將軍墓在鎮北曹家村東南里許並有劉將軍墓東西斜距三四十步又有陳太守墓在東墓右上太守佚其名相傳為南方人精刑名學清道光間以教授生徒終葬此又相傳劉將軍係宋人名廣杜將軍係金人名紹甫考之宋金二史並無其人是以祇載時代其名闕如

監察御史許古墓 在縣東北七十里 大清一統志

元

張禧墓 在縣東建城鎮

吳澄撰墓表張氏之先霸州益津人金亡時就食獻州交河之建城鎮因家焉君諱禧力本多能涉書大義敦厚朴愿不事機巧有侵畔者讓弗與較卒使愧悔里人賢之子完為治書侍御史君受祿養至大辛亥四月乙巳終於京師年八十四完奉柩歸葬先塋是月辛酉也君之考諱實貧而好施罄所有賑濟鄰里不計家之匱乏雪天值無棲

泊之客延之宿食飛蝗入境竭誠默祝徧集四野獨不犯其稼君之妣王氏生甫八歲而事繼母趙氏君之配趙氏世居建城之北理家勤儉有法先七年卒得年七十君之子五曰進曰忠曰完曰信曰賜進簡重不苟忠質直自怡完事成宗於潛邸得見世祖初授承事郎與國判官廉明有聲遷戶部司計出點視倉站遇鷹房官害民歸上彈於省再遷監察御史擊強無所避忌丁母憂去服滿超擢大中大夫治書侍御史風力如監察時忤尚書省權奸幾不免聖上龍飛將大用又以父憂去除河東道廉訪使轉正議大夫同知總管皆不就除工部尚書不及祿而卒諡端愨賜早亡信溫謹給事皇太后宮君之孫七進所生日允曰正曰誠忠所生日賢完所生日彛曰仁嘉信所生日禮君之曾孫四正所生日定安誠所生日錫柱賢所生日永安曰燕珊女一婿劉順孫女入完在御史台糾尚書之過舉朝愕眙予時在國子監令國子張生策告曰人臣惟忠與智忠者不愛身不負國智者有益於國不損其身復命曰吾寧死不顧予嘉歎焉雖未合中行亦可謂直臣矣其卒也遺言命彛曰吳司業文必傳世爾往求之以表爾祖之墓吾死不憾彛因父命因張策來請澄不可辭也於是爲之序次云爾

明

戶部左侍郎及宦墓 在縣西二里勅葬

翰林院修撰余繼登撰墓表往嘉靖中吾邑蓋有戶部左  
侍郎及公云公名宦字士顯別號二河予為童子時猶憶  
邑諸父老子弟嘖嘖稱公長者若走卒之子戶部君實也  
自公捐館舍且四十年矣比予與公仲子戶部君同官於  
朝見公所舊游處其薦紳先生問知公之子咸津津然述  
公功德願交驩戶部君則又竊歎公之長者蓋不直為德  
於間而已萬曆戊子予以使事過里中會戶部君先以  
其事歸與予言因歎公飾終之典闕焉弗備以予典記載  
乃授予以狀使表其墓道之石予受狀讀之則皆童所習  
聞暨縉紳所稱述者種種當實不爽也狀稱及氏為交河  
著姓上世以率孝弟力田含采弗耀自齊東丞善始通仕  
籍由齊東而下又四世始生公公生而警敏授書塾師一  
再目輒成誦既授廩又肆力於學不問生業名日起正德  
癸酉舉於鄉明年甲戌成進士會簡諸進士茂異者為省  
臺公與焉授兵科給事中公即未試理人而明習時務之  
要諸所條上引當否指切利弊都御史甯杲討賊無功懼  
嚴譴乃掠細民為賊欲因以為功公劾罷之嘉靖改元言  
者請遣廷臣覈諸鎮錢糧寢盜者已得請尋詔止宣大二  
鎮使者勿遣眾論譁然謂二鎮侵冒視諸郡獨多不宜廢  
詔長奸以累平明之治宜簡諸臣有才望者急往按之乃  
共推擇公偕侍御俞君集往公先後疏劾朔州總兵張輓  
報中引鹽虧納數多故令人潛燬永寧場一百一十餘萬  
委小民脂膏為煨燼大同鎮守太監馬錫監倉劉景前總  
兵朱振侵費不貲都御史楊志學曲法狗人於是下輓等

御史逮問籍振等沒產債贓請託不行聲震中外然用是  
不得久在禁闔以兵科左給事中出為寧國府知府寧國  
俗故浮詭公用愛利為行而一稟於至誠民不忍欺先是  
巡撫應天都御史吳廷舉言高淳故困養馬今又代養蒙  
城馬三百有奇宣城五縣無高淳養馬之苦而歲侵高淳  
蕩田之利宜均役以甦民困疏得俞旨而五縣豪何隆輩  
鳩衆大譟至二百餘人公以身當之為開陳禍福且急白  
都御史移檄省諭衆始解散時微公則衆怒叵測流禍未  
已卒定養馬議正隆等誅治諸臣首事之罰而公亦調守  
懷慶然寧國人德公至比屋尸祝之公守懷慶以外艱歸  
起補鳳陽公治兩郡如治寧國狀王辰陞浙江按察司副  
使時海寇劫掠並海諸郡縣官軍禦之多失利惟公檄指  
揮楊准并勅諸賊曹所擒斬八十餘人會有為俘寇居間  
者公執不可其人恨恚啖御史謝君蘭列諸路玩寇狀  
詞連公詔公解職聽覈久之覈者言公實有斬獲功御史  
所指無事實起公陝西副使尋為其省參政以內艱歸服  
闋補湖廣參政歷山西按察使左右布政使公勤於舉職  
而拙於取名厚於恤民而薄於養交入仕三十餘年兩遭  
口語循資累級不越恆調歲乙巳始入為光祿卿未幾以  
副都御史提督操江長江盜區往往傷敗行旅公諸所擘  
畫皆飭備銷萌要計又廣募射師分教材官健兒而時以  
身督肄之江淮戍卒多善射自公始丁未晉戶部右侍郎  
尋轉左司農歲金錢不能給公佐其長綜覈均節盈縮有度  
不費大司農

諸屬咸倚以受事公在戶部久時器重公將大用之而公以疾乞歸疏再上始允其請比歸四日而卒詔予葬祭如例公雖公廉不可干以私然性淳厚篤於故舊身為列卿猶步行里中與鄉里卑賤者鈞禮居處節儉祿入以分給族黨歿之日家無餘財嗚呼此公所以永終譽而沒世不忘也俗之敝也士有起奧溥躋通顯者率凌轢其鄉人甚或魚肉之卑人以自尊瘠人以自肥卒之骨未寒而仇者起子孫不得聚廬而處者比比矣聞公之風寧無愧乎予故表之以告鄉人期與後進之士繼公而興者有所則倣而砥礪焉公家世生卒已具少宗伯孫公而興者有所則倣言官大興主簿仲萬祺南京戶部主事季萬祥有聲諸生中將繼公起諸孫謙訥朴皆邑諸生讓慎恪檢楨櫓曾孫受益昌運傳芳景運承芳翊運玄孫遠森森未艾則誌所未載者故特列之以見天之報施善人如此

翰林院修撰余繼登墓 在縣東四十五里泊鎮西南石橋東

北

吏部主事于欽墓 在縣北二里

張將軍守正墓 在西關外

按張守正其先永城人萬曆間兄守忠襲後府僉書守正

隸京營以遊擊用三十九年春河套部敵犯甘州之紅崖  
青湖官軍禦卻之以功進參將後因清兵陷清河堡議免  
遂流寓交河卒年七十卜葬西關外其子孫仍隸故籍云

湖廣右布政使馮時雍墓 在縣東南五十里李道灣

南康府知府許仁墓 在縣西郭外

按察司僉事王重賢墓 在縣東八里莊東

按察司僉事常時平墓 在縣東五十里泊鎮西郭外

按察司僉事王珩墓 在縣東北三里王莊東南

尙書忠端孟兆祥墓 在縣東五十里龍家屯北

按孟兆祥與子章明墓聞在泊鎮東南蕭家圈守墓者尙  
有後人此云龍家屯未知孰是

劉將軍墓 在縣東北九十里蔡家莊東里許尙有墓跡可尋

名字失考

大理寺少卿蘇銓墓 在縣東五十里蘇家屯

清

翰林院內閣學士王蘭生墓 在縣東北一百里獻縣地王盧

家莊東半里許

按察司副使王瑄墓 在縣東八里莊東

陳太守墓 在縣北曹家村南里許此公諱籍見前劉杜二將

軍墓註



寺觀

僧之居何以名寺漢明帝時摩騰以白馬馱經來止於鴻臚寺遂立白馬寺以居之此寺之名所由昉也道之居何以名觀漢武帝作蜚廉觀益延壽觀又觀之名所由肇也古云非聖人之道即異端不擯斥之而採錄之毋乃非維持聖教之義也乎然紫陽作通鑑造寺必書所以垂戒後人使之知邪宜黜而正愈崇志寺觀

城隍廟 在縣西門裏路北

明御史王珩撰城隍廟兩司記朝廷建都設邑即立城隍神以司境內事其所以保障國家撫安黎庶咸於神焉賴之是故邑以建廟廟以棲神蓋使人有所向而知敬事至於廟之側多設司宇塑以衆像又使人有所監而知勸懲也吾邑素為僻陬民力寡弱廟建而司尙未之修謂非廟中之缺典者乎邑耆傅棟嘗有事於廟之修葺志欲創建司宇恒懼其不能為久而未果迄嘉靖戊午歲乃躍然詣守廟道士梁高泉曰廟傍有隙勝地也歲際豐亨良辰也

吾與汝協心募緣修建兩司以補廟中之缺善事也未審  
 汝肯同志否高泉即叩首唯願以募使承既而又謀邑  
 中老於神期在清白乃心以成大舉遂竭力募緣於四境  
 誓告於男女素稱善信莫不樂施貲財若或使之未半載  
 凡士民不下一百金由是鳩工聚材經營締造東西攸分其  
 計其有越一載庚申春而兩司落成煥整改觀矣時欲塑  
 間各六越一載庚申春而兩司落成煥整改觀矣時欲塑  
 衆像暫寢再越二載為癸亥夏歲頗稔而往事復興且董  
 之故暫寢再越二載為癸亥夏歲頗稔而往事復興且董  
 又祝之前願發心者每司一夏捐金六兩以爲塑費且董  
 工朝夕俾殫精巧刻木範金模真肖像善其善惡其惡各  
 司立名各取義維時三月次第告成夫棟等又以廟之前  
 而衆像設鼎修至此亦庶乎苟完矣棟等又以廟之前  
 無陰翳也多植楊栢樹於階以爲廟之茂林廟之後尚促  
 滯也棟特命其弟樑輸財易秦子宅寬九間許以爲廟之  
 後戶夫然後前左右內外條理司宇森列氣象赫嚴是  
 誠所謂冥司地府也其所以慰神而化人者不在是耶何  
 也神人原爲一道幽冥初無二理即人之明而尊崇乎神  
 者如此則神之幽而衛護吾人者可知自此而愚俗化導  
 物阜民安殆與廟貌相爲無窮者未必不自今日始也予  
 邑其盛矣哉嗚呼事物之成存乎數風俗之美存乎道  
 之感也存乎心神之應也存乎兆舉於是乎有徵焉茲托  
 石以垂不朽棟等以識歲月云予亦樂其成故不獲辭而爲  
 之述其顛末以識歲月云予亦樂其成故不獲辭而爲

東嶽廟 在東關外路北前有十二太保殿一座年久傾頽圍

垣盡圯生員房獲實捐貲督理重修後殿及兩廊復築牆垣

知縣牆鼎捐俸以資丹雘廟貌煥然一新矣時在清康熙年

中

玉帝廟 一在縣東南隅 一在泊鎮

八蜡廟 在東關外路北

馬神廟 在縣治內

土地祠 在縣治內

關帝廟 一在縣西北隅 一在北城樓

大理寺左寺正蘇銓撰廟碑記從來帝王卿相聖賢豪傑  
功德之在天下者則國崇祀典靈應之在一方者則里饗  
血食祀典之在國者窮鄉下邑不得私設一豆血食之在  
里者儀曹史院不能光昭千秋若夫國崇其祀如日星之  
尊里饗其食如祖稱之親者其惟皇清新封忠義神武關  
聖帝君乎自炎漢通侯之後曆代皆加尊稱或王或帝而

文人不墨士矢口則曰夫子是之不惟王之帝之而直且聖之  
 矣又不惟尊之親之而直且師之矣蓋以帝之際著其績山  
 扶持名教道在人其心而不徒於戰勝攻取之際著其績山  
 河帶礪之間名劉六劉七之亂所向無堅城交以斗大土  
 樓如明萬曆時劉六劉七之亂所向無堅城交以斗大土  
 隍安如磐石賊不敢仰面而攻以矢相加遺城之內外  
 人安如磐石賊不敢仰面而攻以矢相加遺城之內外  
 載之矣不見帝持刀躍馬沿城馳驟神威不可嚮邇邑乘且  
 哉夫天下何方不祀帝何人不尊帝而受其庇佑者未嘗  
 概見豈其有靈與不靈誠與不誠之殊哉而非也神道與  
 人道相為表裏天無私覆地無私載而戴天履地者相去  
 不啻霄壤語曰栽者培之傾者覆之此之謂也交邑風俗  
 樸茂稍為近古在朝者矢忠悃在野者尚篤實而薦紳君  
 子又共以大道為公之誼相為琢磨無僉王宵小之風無  
 淫靡奢侈之弊無險詭傾軋之習所以獨邀帝靈是又當  
 永矢靡斃以同迓神庥者邑令馬公固帝之里人下車  
 卽修城濬池而又鼎建四城樓不費公帑一錢不用民間  
 一株翬飛雉舉屹然金湯真相因以成不朽之盛事也  
 馬公諱龍見山西安邑人

三官廟 在縣西關外

鄉進士及朴撰重修碑記 邑城西舊有三官廟創建於  
 明嘉靖中至萬曆初年孝子趙守先一更新之而邑人時

一變捐金佐其事歲癸丑邑侯党中疇以公事至廟中見  
 棟宇傾壞命募緣修葺首捐俸為之倡於是守先以閉關  
 不出而時一變復董其事既告竣將勒諸石垂不朽而意  
 文屬予予聞三官水神也邑人崇奉之罔敢不肅不恭意  
 者其以水患與蓋敝邑近年以來被水患數矣壬辰之  
 水以秋夏之交靈雨霏霏不絕陸地盡成波濤老幼徒手  
 取魚邑侯劉公冠南決計疏濬以東北為尾閭而水不為  
 害丁未之水滹沱決於西衛河決於東邑四面受浸城以  
 外方舟往來水不為患若歲癸丑之水則又甚矣自五月至  
 累晝夜而水不為患若歲癸丑之水則又甚矣自五月至  
 七月雲若屯而雨翻盆者不減於丁未也幸今邑侯党公中  
 決沒嘉禾而漂廬舍更不減於丁未也幸今邑侯党公中  
 疇先期百計撫字比屋有餘蓄不親履窮簷察民之菜色者  
 之計又無不周咨而力行之又親履窮簷察民之菜色者  
 徧賑之老幼賴以全活而水不為害語曰神聰明正直而  
 依人者也敝邑水患較他邑為甚乃他邑之神或免被  
 其害而吾民賴賢侯之力竟以無虞謂非神之默佑其間  
 與然正惟神之福吾民也必借司牧之善政則修民之事  
 神也亦求為司牧之良民也耳誠能以修祠宇者修民之  
 香火者奉法則刑罰之所不殃咎之所不及而賢侯  
 之軫恤即神明知事神自有至理若夫世俗祈報之說非  
 此以告里人使知事神自有至理若夫世俗祈報之說非  
 所敢知也

一在泊鎮西門外  
 一在新橋村  
 一在軍王莊

在郝村  
 在陳屯  
 在顧皇莊  
 在大師莊  
 在韓家橋  
 在小閻家塢  
 在東流堡

鎮武廟

一在縣城東北隅  
 一在杜將軍墓後  
 一在泊鎮  
 一在郝村  
 一在高川屯

一在劉潘村  
 一在流澥寺  
 一在王永豐屯  
 一在千民屯  
 一在東新店  
 一在周家寺

一在王孔村  
 一在南孟莊西頭  
 一在顧皇莊  
 一在軍董莊

玉皇閣

一在富莊驛  
 一在文家廟  
 一在西新店

西方菴

在西關外岳莊西有古柏一株  
明萬曆七年修今廢

泰山行宮

一在縣西關街北  
 一在燒盆張莊  
 一在徐官屯  
 一在粗布劉莊

一在李莊  
 一在蔡莊  
 一在千民屯  
 一在郝村  
 一在泊鎮北街

四大王廟

一在縣西關外  
 一在泊鎮河岸

火神廟

一在泊鎮御河岸  
 一在顧皇莊

三義廟

一在泊鎮北關外里許  
 一在曹莊

藥王廟

一在縣城內西北隅  
一在齊家堰河岸  
一在窪東村  
一在文昌廟村  
一在高川

劉守真君廟

一在縣城藥王廟東  
一在賈窪東

龍王廟

在縣北門外  
一在龍堂村  
一在郝村

觀音堂

在南關外  
一在郝村  
一在太師莊

張仙祠

在縣城西白衣廟內  
一在泊鎮城西關  
一在泊鎮城北河岸

興化寺

在縣治北僧會司在內

陝西苑馬寺卿徐佑撰重修興化寺碑記  
交河屬獻縣後因之隸河間縣治之北稍東古有鐘鼓樓  
寺建於貞觀間歷五季宋遼金元毀於兵燹規制廣狹不  
可得聞然遺址及鐘尚存鐘表有文曰大金皇統七年則  
其歷年亦因可考口口口口奄有天日法古建官縣置僧  
會司設僧會員洪武王戌僧會智資始於舊址建佛殿三  
間改其名為興化正統丙辰僧會性朗增建佛殿五間天  
順癸未其徒思廣建伽藍堂三間經年既久日漸凋敝弘  
治癸丑僧會惟政乃思廣之徒寺僧大淨亦惟政之徒也

賦質端謹精勤乃業一日言曰殿陛清穆朝香暮誦期以  
 仰報皇恩我學佛者分內事也顧茲傾頽雖欲展禮且猶  
 不可何凡三載遠近敬慕會所有遼州善士朱君廣信邑大  
 如高君世用為倡首人之捨所有以輸於寺者如市由是  
 姓工度材重修佛殿五間獸脊簷瓦易以琉璃椽梁棟  
 飾以丹堊伽藍祖師堂各三間東西兩廊各五間山門三  
 間諸佛諸像塑裝儼然屋壁塤塤繪綵聿新作於弘治丁  
 巳十月十五日落成於弘治庚申四月八日工竣堅完  
 規模宏大雖不足以擬往古亦可謂一時之盛也夫世固  
 有善名而行為實戾者毋怪乎人以異端議也若淨公篤實  
 務成恪終乃事朱君廣信高君世用又能輔翊盡誠其名  
 善而實副者歟使父子君臣各盡所事而誠以終之如此  
 豈有不治者也余素慕古道而務情實重以淨公請予為  
 記噫距唐貞觀至弘治千有餘年此寺廢興不知其幾通  
 無石刻可考今淨公不獨務成其事又必立石求記以垂  
 諸遠其用心可謂精且切矣予遂愿考縣治沿革初寺  
 之始末併今重修之實期以示諸不朽云

彌陀寺

在泊鎮西門內

觀音寺

一在泊鎮

一在永豐屯

一在七村

興隆寺

在齊家堰

一在三七祖



水月寺

一在泊鎮七里口

一在下馬頭明弘治十一年重修

獻縣教諭陳邦

器撰重修碑記古獻交河縣治南一舍許有佛舍曰水月  
 禪寺據金石志創於魏泰和元年實漢之章武口年也自  
 漢迄今上下數千百年其間治亂之相尋正閏之相軋兵  
 燹之經於其地者又不知凡幾而斯寺也巋然獨存則未  
 世之崇奉主持之不衰可知矣歲弘治戊申有字佛氏添  
 佛入持主席慨業之閱歷風雨久將就頽無以聚緇流口  
 口口口紹宗風迺刻志窅形持清戒以蓄餘費且福田利  
 益唱誘鄉人捨身施財徧行募化共得錢口餘緡遂掃瓦  
 礫治蕪穢鳩工庀材陶甃而一新之外之三門內之堂廡  
 經藏庖福之所皆易朽蠹而為良材去湫隘而為元爽變  
 漣澗而極鮮明興事於弘治乙卯夾鐘之月哉生明至戊  
 午太簇之月旁死魄始克竣距今又若干年矣其徒曰法  
 欽者懼是事非記卒將沈鬱無聞乃欲鑄石因吾生李鑑  
 求筆於余余惟以是作非制也使吾力重於梁惠公則法  
 欽必無是事之告我言重於曾子固則三門記亦奚擇干  
 里人之齊畢耶無所畏其外無所動於中口口蹤跡又疏  
 遠於南北如此言其可瀆乎哉故因其請姑次其始末以  
 見其師弟二人拘法而不替其宗風如此是亦時人之所  
 樂與也不可以不記若夫未敢瀆者庸俟君子

洺河寺

在縣東三十里久廢

河南汝寧府通判樂亭李章撰文進士馮時雍篆額進士  
常時平書丹

交河縣馬頭莊洺河北滙曰洺河寺考宋地志為樂壽分  
地樂壽今獻縣是也在易滹二水之間縣因以名寺逼洺

河莊以馬頭名豈洺水之津耶津即埠頭馬頭又埠頭之  
異名耳今洺水雖絕流而其跡尚存故縣名洺陽即此是

也寺在縣北少東前元至正三年有行脚僧續欽至其地  
愛其地之爽塏地主王智明施地一隅為今寺云明宣德

二年馬頭莊人致政江西按察使僉事劉瓚同本莊人王  
升泊寺僧行果倡義重建弘治八年施主郭友才孟三王

剛僧人圓泰復加增廣視昔有加矣嘉靖二年僧覺松施  
主楊經孟達復增飾之為佛殿三間僧廬三十餘間伽藍

殿三間山門一間其南北六十步東西五十步繚以周垣  
其地南至洺河北至寺門郵東至八尺阜西至新店嘉靖

十六年秋八月寺僧福懷施主劉銓造南村巧文以垂永  
遠余思唐顏真卿一代名臣書法名節號稱雙絕然每為

寺觀碑誌輒親書之且刻名其上今往往見之余何人斯  
敢勒之耶謹按佛氏唐德宗朝迎骨禁中昌黎韓子抗疏

極詆遂有潮陽之行其後僧三藏取其愚駭者多信從之其  
是也以其闊大虛幻以誘齊民故其愚駭者多信從之其

高明者又為窮神知化投之多為所惑陵遲至今寺觀偏  
天下緇衣滿道塗我太祖高皇帝又龍興於皇覺寺俾前

元舊刹仍之毋毀列聖相承莫之有改制在典章豈非氣  
運所在邪正相糅各有其時也耶蓋嘗論之佛之立教亦

彼西方一善人耳使其徒習其法守其律以化其人則盜賊不生淫奢不作不失為一鄉之善俗何不可之有乃有狡黠之徒架空增飾為不可致詰之說以倡之至於吾儒之俗者亦鮮不為其所陷况無知之編氓乎宋大儒程夫子乃有佛氏之言近理所以其害為尤甚而孟氏七篇大率辨異端闢邪說以承三聖蓋為世俗計不得不然耳彼二賢者豈不自知入人之深有不可一朝解者蓋聖賢衛道之心止論其邪正不復計其勝不勝已於乎余於泮河寺碑之文烏能已於三復唐虞三代之盛而上詠華胥之夢也耶明嘉靖十六年

### 聖壽寺 在縣東三十里前牛官屯舊名劉姑娘屯

恩賜儒官楊一德撰記聖壽寺古刹據舊記云得地誌石寺建於唐高祖武德元年戊寅僅存者荒基瓦礫茂草而已至明初有僧人結菴就其基址善土捐地廣其營建人亡事寢數使然乎至成化甲辰始修成寺弘治戊午而豎碑焉此舊記可據者如此奈自成化甲辰後以及嘉靖年來時光易轉風雨吹淋而寺甚頽壞有本寺耆德號無為上人者俗姓許氏本屯巨族慨然捨財遂自嘉靖三十八年己未歲興工重修至萬曆五年工始竣云

### 廣福寺 在縣東二十五里

明隆慶五年余繼登撰記八尺皋距交河縣治二十有五里左襟衛河前帶泮水居民纍纍自昔稱原福鄉故寺有

匾曰廣福寺有石佛自寺址中掘得之蓋古刹也

### 興化寺 在縣東北九十里馮家口

### 陽氣寺 在縣東北九十里

皇明崇禎四年刑部右侍郎孟兆祥撰重修陽氣寺碑記  
 巍哉古刹額曰陽氣重修在天福二年其創建之初世代  
 綿邈不可稽矣而標額若有異焉者何訊諸海內洞天福  
 地無是名號而獨見之交河縣治之東北隅交河古樂壽  
 邑父老傳聞此邑舊無鞭牛盛事則又有異焉者矣倘以  
 是刹肇基於良震間由翁之闢抑陰扶陽福民壽國饒已  
 具足神化而春事無庸例舉歟大約化機乘乎氣數氣數  
 關乎人事是刹在宋式微之後陽氣舒而未盡舒法輪不  
 轉於委頓也曆元蹂躪之後陽氣塞而未盡塞妙諦不染  
 於腥羶也迨我熙朝驅胡元而定鼎百神呵護卽曇臺梵  
 宇莫不效靈一時向善人心梯山航海多所締造矧梓里  
 古刹目對頽壞而無惻然動念者於是世德長者如孫  
 邦慶大捐資財為衆善勸整飭荒廢釐然備舉若正殿若  
 陪殿若天王殿鐘鼓樓與山門丈室等煥然一新見謂規  
 模之宏闊實蒲團之展布也見謂簷阿之輝映實禪燈之  
 光被也見謂鳩工督衆竭蹶於人事者因實蒙麻襲蔭借  
 資於法力者果也仁看一方雨暘時若陽和元氣盎溢阡  
 陌家給人足而文風日振非邀福竺乾也此理數必然不

券而自合者事峻宜鑄之貞珉以誌不朽予固快覩其事而樂記其盛云

福海寺 在縣東北七十里

勝福寺 在馬連疇

永勝寺 在高川

地藏寺 在高龍華

潮海寺 在李村鎮

興圓寺 在流澥鎮

石佛寺 一在魯道 一在富莊驛 一在常巷 一在王官屯

興林寺 在郝村

雲居寺 在惠家莊

建城寺 在縣東北四十里

萬家寨寺 在縣北二十里

塔院寺 在薄洛村

隆興寺 在富莊驛

鴨窩寺 在縣西南三十五里

甜水營寺 在縣西南三十里

竇莊寺 在縣西南四十里

藏經寺 在陳屯

圓覺寺 在縣西南十五里

興福寺 在縣北徐官屯

灌河寺 在黃官屯

湛覺寺 在縣東北六十里

開元寺 一在徐官屯 一在潘村

文昌閣 一在郝村 一在小城村 一在文昌廟村

玉蘭閣 在文家廟

奎星閣 在莊頭

花園寺 在縣東五十里採訪員傅格康記漳河南岸有古寺即舊志所載之小營寺也以近於小

營村故名小營寺其當年碑記半沒於土中啟而視之文載花園寺寺有月牙橋餘皆模糊不可辨識憶康少時隨長者至寺其時古屋龍蛇禪房花木名香滿院半畝繞廊巨木千章炎天留蔭往來遊人稱勝地焉迄今四十餘年僧皆物故寺亦傾圮僅存正殿勢雖久支徑蔽蓬蒿垣損風雨睹夕陽之瓦礫故景全非殊令人乘興而來者興盡而返也今因採訪聊泚筆為之記

崇福寺 在西新店

大佛寺 一在千民屯 一在東新店

高峰寺 在高峰寺村南今廢

興安寺 在火興莊西

清泉寺 在四家營

華嚴寺 在常官屯東

菴華寺 在曹家魯道

賢聖寺 在小徐郭村今廢

明萬曆七年鄉進士郭紹撰重修賢聖寺碑文  
交河縣治北距四十里許村名徐郭其東隅有寺不知始  
於何時得之僧眾口碑迨我明興已經三建於永樂成化  
嘉靖之間捐資則康濟輩倡首寺住持則一代清鸞二代  
靜海三代道恕其材工丹蘄金碧之費無可考據獨正殿  
三楹東西侍殿各一中間塑像備諸工巧亦一方之勝概  
也顧於周回藩墉正門獨缺豈以其當清河之潏地勢沮  
洳厥工難就雖就而易摧歟邇邇寺浮屠真在善風水重搢  
紳間諒是緣而奮然曰斯工非難惟基之難即推是心新  
佛殿臺級易磚以石復感善會康橋張天爵等及方僧真  
瑞之助無何倍值易地籠土築基載歷寒暑而次第告竣  
亦云艱哉乃於基上當階立表督工樹材先作大門巍然  
竝立頓爾改觀將刻石於寺以紀歲月而屬記於余余惟  
佛生西域所居則七寶光華莊嚴世界是以知我土之梵  
宇崇奉雖琳宮寶刹弗樂也則是舉也無亦增真如之障  
礙而小佛門之廣大歟然佛法無上亦須種因今眾善輩  
或施財或施力或施法固未知夫後日之因果實不可磨  
夫今茲之善心且佛之字於義為覺覺由心生則佛之心



在况迄今之往來茲途者未即瞻佛像而生菩提心已先望佛門而作整肅念此念也即佛也當下頓悟彼岸直超固未可必然墮諸惡道而重其業根吾知免夫諸善之後其有與乎噫嘻吾佛之心亦即吾聖人之心也世之人則咸以聖道之大不如彼佛道之大雖吾儒中且有傾心頂禮而皈依之者是以彼教之日以盛也方今聖天子明率執中總一道法諸司世教者又靡不奉將德意而振刷之即吾畿內近地將有立聖道之門牆而恢拓之者是為記

白佛寺 在白佛堂村

興林寺 在寺門村

盛壽寺 在前牛官屯

將軍寺 在南王莊

九聖堂 一在郝村 一在流澥寺 一在侯莊  
一在張莊 一在小韓村 一在東流堡

一在軍閻 一在靳家菴 一在會彩于莊  
一在南孟莊 一在及八里莊

九龍堂 在劉潘村

三教堂 在李福太莊

白衣廟

一在莊頭 一在大師莊 一在燒盆張莊  
一在潘村 一在梁官屯 一在管子村

一在西關 一在蔡家莊 一在東流堡  
一在東新店 一在南孟莊

曾子廟

在縣治西南街今廢

后土廟

在流澥寺

三王廟

在賈窪東村成平河東岸

玉皇廟

一在玉皇廟村 一在干民屯 一在楊馮頭  
一在白佛堂村 一在王家莊 一在油瓶村  
一在尤常巷 二在東新店

七聖廟

在軍張莊

八皇廟

在窪裏村

龍母廟

一在田家廟 一在馬連疇 一在縣北門外

三皇廟

在曹家村

南海大土廟

在劉八里莊

圓通菴 在北王村

娘娘廟 在洪家碼頭

東嶽行宮 在文家廟

節錄大金承事郎前河中府河東縣令兼管勾河防事武  
 騎尉賜緋魚袋許古撰重修東嶽行宮記交河之元輔鄉  
 舡留寨有行宮在焉蓋里人牛醫高順之所創也初寧津  
 廟荒圯不可修復縣民之主廟擇其材之可用輦置之今  
 廟以爲廊廡之助由是落成實天眷二年也順既物故廟  
 遠民居歲往月來上雨旁風誰意營葺又經大定丙午黃  
 河泛濫至於牆屋頽穿儀衛呈露明昌改元佛留寨屯田  
 百夫長楊振顧而嗟悼之適鄰社百夫長隰仁義劉公進  
 同往視之將補葺罅漏時有軍籍張黑厮曰廟在黑厮所  
 撥之地有能重修願割十畝以資之振等喜因議曰舊廟  
 卑陋弗能經久且漳水在其南滹沱在其北平地漫漫疇  
 昔河淤若不高其基趾萬一水潦堂構其能久乎乃規模  
 廟爲一臺而殿廡門宇又增高於其上於是鳩工飭材衆  
 役具舉尙乏泉貨以備齎鹽衆曰廟西泮水故道當鹽車  
 往來之衝夏秋泥淖行人艱阻若駕木爲橋簿算輶車不  
 獨有補日用又免揭厲揮叱之勞尋乃橋成遂得兩濟厥  
 績用成刻之貞石以傳不朽

### 三聖祠 在姜官屯御路旁

姜官屯人耿橘字廷懷少孤寒士也明萬曆辛丑進士性純孝而天資魯鈍童蒙時與同學戲於水中得一巨石視之宗聖像也邀村人集資修之至御路旁力各不支雖更加人亦不動遂求村人集資修一小祠從此文思大進後依寡母寄居獻縣單橋外祖林氏家即隸獻縣籍科第連捷母歿後於林氏宅旁修有孝親廟中修其母之石像朝夕供奉此廷懷純孝之一證也任常熟縣因水患註治水全書數卷告歸後思前修宗聖祠廟宇狹隘復大啟規模增以述聖亞聖像名三聖祠清光緒中衍聖公過境見之猶入祠謁拜云

老子廟 一在張莊 一在靳家菴

鐵佛寺 在西關何莊

準提菴 在城南

鴉窩寺 在東西盛富屯兩村之間

關帝廟 一在靳家菴 一在東新店 一在前馮西河岸

一在高川 一在張吉草 一在文昌廟

青龍寺 在前趙家馮頭東里許今廢

如來佛殿 在郝村西街路北

天齊廟 在營子村

顯幽祠 在齊家堰村東北

保安寺 在前李屯西頭

化城寺

在縣東七十里御河北岸有清聖祖賜額其創建年月殿南碑記崩裂難攷殿西碑末載乾隆十三年候補經歷趙滋本書丹字僅可辨惟殿東清高宗御製碑三面字皆清楚詳記藝文中

聖福寺 在高川村南

菩薩廟 在燒盆張莊

孔聖廟 在高川

黃經堂 在高川

圓寶寺 在弓高城

邑人王子舉人葛秀撰嘉慶三年七月重修弓高城圓寶  
 寺碑記中水治東有弓高城城東南隅有圓寶寺之所  
 由建不可深考此城自漢封韓王信之子顏當為弓高侯  
 厥後晉及五代沿革互異至唐幽州兵陷弓高其地遂廢  
 爾來千數百年矣其間文人學士良將勁卒以及宮室臺  
 榭歌樓舞館者不知凡幾迄今牆垣傾頽盡為禾黍欲訪  
 其遺蹟故老盡矣顧此寺屹然獨存者其佛力為之與抑  
 諸君子欲藉其寺以不沒其地而為之與四方君子瞻仰  
 茲土者見夫殿宇嵯峨禪林清肅未嘗不流連嘆曰此圓  
 寶寺也則夫弓高之名之所藉以不朽者圓寶寺之力也  
 而此寺之所藉以不朽者諸君子重修之力也然則諸君  
 子捐資財運木石辛勤勞碌謂之有功於圓寶寺也可謂  
 之有功於弓高城也亦無不可近由乾隆三十七年修大  
 雄殿嗣後修毘盧殿鐘樓皆未暇勒碑今春禪室適成前  
 後諸功果文茸而新僧智貴等囑余作碑遂援筆而誌之

識餘

仙釋異聞

軼事

怪力亂神孔子不語尙矣至左氏侈鬼神談夢卜其作傳也人每譏其浮夸焉然於春秋謹嚴之意仍無傷也今舉而附之識餘斯亦外編附錄之倫奇而不譎於正也於是統仙釋軼事異聞總爲一類志識餘

仙釋

道光間任老鴉村任勳十六歲入玄門法名普勛拜佛誦經晨昏靡懈若泰山西域寺諸名觀無不遊歷可異者預知死期先時徧邀親友與訣謂大數將及僉笑其癡暮春呼其徒爲具袈裟等具衣畢端坐而逝

採訪冊

韓村九聖堂有僧法名達貴稍識字義言語遲鈍性好花鳥誦經外卽默坐而已凡有人問其年齡卽曰九十九歲矣如是

者十餘年光緒三十一年十二月間有羣鴉飛鳴繞其廟終日僧曰吾壽將終逝我者至矣卽命衆僧爲備袈裟鞋帽衣冠訖瞑目圓寂統計其年百有十餘歲矣

採訪冊

邑東關李文運自幼不苟言笑而好佛城東北有白佛寺屢赴寺與禪師談經悅甚後遂棲止寺中偶歸省親餘不問也觀其形狀披袈裟坐蒲團常梵唄出寺則肩荷鐵鏟繫一葫蘆人疑鐵李拐復生冬日單衣不畏嚴寒用撫摩之術爲人療疾無不應手而愈求者甚夥一日夢神乘雲來迎覺謂人曰吾將西歸矣不數旬而歿其姪葬之故里東墅

採訪冊

### 軼事

邑北門裏白公諱璿康熙丙辰進士不樂仕進終身課讀自給一日課畢晚歸飢甚方入門聞其子屋閉戶聲隔門窺之見



其子以燒餅食其孫退而忍飢卧戲成一絕云隔著門縫望裏瞧我兒他兒吃火燒他兒若成我兒大我兒也是摸不著雖游戲筆墨亦可動人孝友之心後偶登城遊眺見城下一錢降而拾之非錢也及登城再視依然錢也又降視而仍非錢如是者三倏有人過城下拾之去公急追問曰錢乎曰錢也人雖運蹇豈一錢之得失亦有數耶

採訪冊

莊頭增廣生李元龍設帳興濟劉氏家劉豪富後遭變被抄劉有豔妾數人身携金珠等物赴館中求先生卽納爲妾以庇之先生立揮之去及欵差到見先生在書房中命從人曰凡先生物勿妄動先生指一硯曰此硯外均劉家物由是觀之先生之爲人財色不能動其心亦超衆萬萬矣

採訪冊

段玉交河顏家村村民也與同邑劉大文王宏聲顧士起同傭

於寺門村孟生奉宸家生固刻吝遇段尤簿道光二十四年  
顧士起得癩症走失徧覓未獲衆疑之後數月村北八里孟  
太監村灌園者汲井得尸報縣往驗腦有傷奸民某往告顧  
妻曰聞某井之尸爾夫也蓋往認之卽誤亦無罪顧妻果認  
而訟之令疑有姦因繫孟生及孟妾崔氏並諸傭俱至署徧  
加刑訊無確供命姑退候再質是夜有人往見孟生等微示  
以供詞大旨且曰不如是供明日公庭恐成刀山劍樹矣翌  
日果一一各加嚴刑備極慘毒劉大文因誣服謂已與崔氏  
私被顧窺見崔恐其洩諸夫也因設計誘顧入室疾呼夫至  
反誣顧以強暴狀夫大怒立命劉大文持鞋底環擊斃之時  
夜已分置尸車中載出而沈之於井時司門之啟閉者段玉  
也云云孟生與諸傭俱因不勝嚴刑亦誣服如劉供當是之

時惟待段供定案使段亦誣服則被繫諸人胥登鬼籙覆盆終不能釋矣段因前跪叩首曰是夜小人安寢實無啟門閉門事乞察之令勃然大怒曰衆證俱明爾何故獨敢爾謂不能以嚴刑加爾也急命笞之數百猶不止皮破肉綻血濺役衣訊之曰爾是夜仍安寢否段不語令疾擊堂木連呼曰索子來役急持鐵練至擲地有聲盤兩峰令段露膝跪其上兩役左右提其耳使不得俯仰如是者十餘次膝肉盡脫血淋漓露骨焉訊之仍不語令切齒目役曰且扶下俾遲遲受諸苦旣熾洪爐不慮銅頭鐵額也越數日膝瘡未愈又鞫之令役以碎磁鋒置夾棍竅中痛夾之收繩甚緊脛骨欲碎訊之仍不語及又鞫令曰今優待爾但坐話不須跪也因置橙一條縛段其上不得動兩膝束尤緊使與橙平乃用磚掀足踵

而墊其下每遲一時必增一磚及增至三磚骨拔有聲筋痛  
欲折令曰樂乎可以言未仍不語俗有所謂好漢架者匪刑  
中之尤毒者也或鞫強却凶盜能禦刑者間一施之不爾不  
用也令謂段曰爾好漢也宜上架上之目直視口微張頭汗  
如雨面青紫無人色訊之仍不語令怒目如炬氣吹鬚動冷  
笑曰爾或龍華會上人與我有香火緣耳今且與爾了是緣  
因燃巨香燒其腕不語燒其背不語燒其股不語燒其腓不  
語是時堂上侍役堂下觀者皆戰慄無人色而段亦徧體焦  
紫曲折迴旋幾如蟲書蛇篆更無著刑處也訊之仍不語令  
沈吟良久乃迴頭作喜更作溫語勸之曰爾何執迷至此爾  
亦父母遺體受傭值幾何何代人受楚毒如此且啟門閉門  
亦有何罪爾不有父母在耶家貧故傭倘斃於嚴刑爾父母

老矣無所依爾爲鬼能瞑目乎段乃頭髮上指目眦盡裂厲聲大呼曰天乎寃哉予亦血肉之軀並非木石不知痛楚但旣具鬚眉爲男子便當不昧天良有曰有無曰無青天白日真假難欺豈得以子虛之事污人名節罹人大辟供萬口唾罵爲彘犬不若之事哉吾今死矣死可以對天死可以對地死可以對人遑知其他天乎寃哉語畢嘔血數升倒地不起令大驚急醫之始蘇焉邑人士聞而咋舌曰絕乎異哉此鐵漢也向謂貫高氏不足信以今觀之信然矣後被逮至省連訊十餘次守供如山終始不移故孟生之寃賴段得白及歸或謂之曰爾義士也名彰矣段曰我知不作虛語耳焉知義士以此人愈重之貢生王化昭撰文

崔氏交河武生孟奉宸側室也貌豔麗而性貞靜又讀毛詩粗

解大義道光某年備者顧士起因癩走失顧妻疑孟生害之  
訟之官諸傭不勝嚴刑誣供顧與崔私故斃之令繫崔鞫之  
崔曰妾雖小星質賤然稍知廉恥不敢自玷也令笑曰天下  
有知廉恥之妾乎妾矣尙得齒於人乎何作此莊語爲也崔  
正色曰是何言也妾生子爲縣令者多矣若皆不比於人封  
誥將遂停請乎况副笄六珈玉璫象揄致貽鵲將鶉奔之刺  
者不一而足彼豈皆妾乎哉令大怒命取巨枷置巨磚十餘  
於其上覆崔頂壓之自辰至酉終不服堂役接耳私語曰烈  
哉世之男子抱偉質具鬚眉豪傑自命叱咤風生及屈膝公  
庭稍被箠楚便如金在鎔爲甄者之所鑄矣視此能無汗顏  
此殆金剛不壞身也可無賦命之不由矣後被逮至省屢被  
嚴刑終不少屈孟生之寃得白者段玉而外崔氏之力也王

化昭撰

邑南時家莊有僧名閒靜者頗識文義不類俗僧自云金陵人  
遭髮逆亂父母俱失咸豐丙辰夏旱蜚爲災髮匪乏食將攜  
婦女盡縱之靜疑其母在中伏山莽間伺之浹旬不見親面  
混迹叢林中遂爲僧由徐之汴而晉而燕不遑棲處復欲南  
旋抵滄道阻至交河疾作暫羈千民屯大寺後徙郭莊時莊  
廟中終焉其人工詩辭愛四體書雖爲僧罕語空門法老習  
岐黃濟人甚夥化後村人揭殯其墓文蓋靜之自稿茲不贅

採訪  
冊

附其歌三闋歌曰 金風簫瑟兮秋氣深靜室鐙殘兮夜沈  
沈咽寒蟲兮四壁飄泊千里兮何心爲心 嘆此生不辰遭  
多難兮感宿因望家山兮何處寄遠夢兮頻頻 親恩未報  
兮泣不禁怙恃失兮遁跡叢林業不就兮發哀吟日月逝兮  
虛負光陰  
附其長律一首

醉夢行蹤三十秋悲懷離思兩悠悠臨風遙度三江燼對月  
頻添五夜愁搔首何歸憐弔影寄生有淚嘆浮漚蹉跎將壽  
應難補聊賦長歌代楚囚

楊馮頭何清母氏失考原籍青縣二十六戶人清高宗南巡村

中巨匪有黃鼬啣噉等名於駐蹕處盜去龍衣氏知事必發

與村人曰若弗避禍將波及矣他人弗聽未幾剿賊兵至時

氏方娠乃乘夜渡河衣未沾溼時秋水盛漲宛若履冰有籠

燭前導至岸西青龍寺不見不數月產子清後入交河籍中

乾隆丙子舉人任平鄉縣教諭清感神之佑建寺題額曰寒

水濟光

一云定水寒  
光未知孰是



異聞

明正德中羣盜經泊鎮有崔氏母子爲盜所殺崔氏畜犬吠之明日盜復過其門犬齧盜馬足馬不得行盜以刀傷犬犬帶傷追吠歸則守主之屍及盜去家人收屍殮之犬不食號不絕聲而死有秀才唐理者爲作義犬賦

清道光間任老鴉村任文學妻劉氏性嗜佛不茹葷生子不育年四十而寡家事概不與聞惟晝夜長齋至道光二十五年氏八十八歲忽瞑目坐呼聲細鼻涕下垂長過膝瑩若玉柱拭之不斷衆方驚異而氏已仙逝矣

採訪冊

范家莊張姓村東李下一井廢棄年餘光緒七年有人入井取葦盤漸取漸深至水面而死張福泰下井撈之又死後二人以繩繫腰循梯而下未至水面便低頭如氣絕狀井上人急

速提出二人不語口吐涎沫昇至家各服藥數十劑始愈一時傳井中有妖以石灰填之後亦無他異蓋井在林下不得陽光廢棄經年其陰毒之氣自足致人死命

採訪冊

交東北有村名李鋼追村人李某巨富家有狐可通言語求無不與一日向之求大石槽狐默然良久乃曰固有之但途遠物重不易致也汝必欲致須待更深將燈置竈上以大柳斗覆之慎勿啟視違則立禍乃少年無知因久無動靜潛啟視之卽聽大門外有物自空墜下其聲甚巨急出視之槽已在門前矣暗聞狐怒曰爲汝運一槽不遵所囑壓死吾子孫實難容汝憤憤而去明日見石槽當門出入不便令人移之不動從此李之財物轉眼卽失不數年一貧如洗於今石槽尙在噫狐爲人竊物害及子孫可恨又可憫李愛人之物令狐

竊之以爲已有旋被竊去卒歸於無其貨悖而入者亦悖而出之謂歟

淮解窪村王劉氏得狐助而家道小康劉死一日見一蝟其大如斗家人異而擊之遂不見忽又見其自外來背負一磚身一抖磚卽飛起撻人鄰人不信多出穢語亦被磚撻自此財物屢失甚至米糧拋之糞中飲食置以穢物常作祟不可言狀有生員王雨亭不忍袖視邀品行端方兼有壽者數人代爲祝之曰若十日內使伊家安堵必令其修仙樓演戲果如所說王樂甚急償前言孰知償方畢作祟更甚於前無計可施全家他徙

邑東北第七鄉有劉姓素稱善人而心實陰鷲其逆子一日對衆直揭其隱劉卽羞憤外出六月夜間忽大雨傾盆雷繞其

屋而震見有龍爪伸縮隨電隱見其子懼跪求其母代爲哀  
禱雷止天晴明日覓其父歸從此較前稍有孝順焉又有劉  
之鄰趙氏婦不孝其姑亦有龍警之後爲孝婦

城裏西街王禮堂先生與兄枚從應鄉舉赴都寓觀象臺後寓  
所北房三間其兄住東間先生在西間牀依西壁壁上有可  
掏窰一日更深就寢見自外來一婦人高二三尺到牀前躍  
入窰中置一物拜之而去先生用手摸得形圓似石而輕其  
性甚堅卽藏之一時婦返知物失去向先生討之不與遂變  
一孃娜女子作令人可愛可憐態先生不爲之動又變一縊  
死鬼項套麻繩舌出口外尺餘先生亦不懼鬼無可如何遂  
去先生名其物爲墜腳石向燈燒之鬼又至見之遂不討長  
歎而去

邑東北淮漳村徐姓生一女尙在襁褓圍被而坐其母裁衣不當女曰我家母親不如此裁法其母愕然曰你母何氏住何村女曰莊頭林姓其母遂告於其父卽與女同赴莊頭認之女指點門戶不差問其前生事歷歷言之林姓母遂認爲義女焉林姓言之甚詳

邑北曹家村曹姓婦因病死不數日有趙家下塢頭趙姓婦心有煩惱在河岸洗衣愈思愈煩遂投於河村人救之不及氣已絕矣昇之家其翁姑命其兒女上房抱竈突喚之婦卽甦啟目四顧曰我在何處旁觀者曰是非汝家乎此非汝之翁姑兒女乎婦曰非我家也翁姑非我翁姑兒女亦非我兒女也我家曹家村我翁曹姓我夫某人曹家事言之歷歷人知其藉尸還魂焉

流澥寺封汝諤言光緒乙未後五月間其先父華齡先生在建昌店館中疾愈後偶得奇夢夢已身穿布衣手持葵扇信步閒遊偶至一所見有別墅一區壁皆壘石極其華美忽有六七十老嫗從門出見其拄杖方行素衫裙履皆極整潔後隨二小女童各六七齡至門前叢槐下注視又來一秀士年五十餘歲端雅不俗手執摺扇蔽日挾一小簞向日南去先生步後隨觀見有許多工人各執斧刊削壁根壘石拋瓦滿地務使之平若墾土作田然一工蹶然起置斧自太息可歎主人翁作計過紆曲緣何毀石室費工與斯役主人作色告工曰削跡作腴田遠爲子孫計近日純袴兒驕奢多習氣俾居華屋中日日生靡麗有田習作苦辛勤自食力俾知稼穡艱庶不至蕩佚工起而對主人曰子孫教之讀不使爭細利吾

見鄉村兒兔册未曾事游子喜輕狂結朋矜恣肆勢非貴公  
子有田皆鬻去主人曰嗚呼噫嘻非此之謂也爾來多日矣  
未見吾之門額署曰耕讀墅乎吾家世耕讀安肯薄儒士今  
朝使苦作不容兒輩嬉牛角常掛書荷鋤亦攜籍時還讀我  
書此中多樂趣富貴一念及氣體自移易甘食復美衣車馬  
壯其勢氣焰正逼人人人思遠避富貴埒王侯榮華能幾日  
何如耕讀家中無大險巇子子復孫孫引之無時替試看塵  
世間古今曾有幾工人投斧謝曰小人見俚遠不逮此先生  
聽其問答詞皆有理寤頗記大半因而誌其略云

同知蘇爾連光緒三十一年夏爲父延醫路經郝村以北約行  
二十餘里至一大野忽見土牆一道東西約三四里許牆外  
皆白水環繞遂向車夫曰汝看前一大牆牆外皆水非迂道

不能過矣車夫曰然及離牆約有半里牆忽露孔由孔窺牆內皆水迨至近處牆水皆無訪諸本處父老咸曰此處舊有陰城或三年一見或十年一見此殆陰城出見歟以上所陳皆連親見絕非妄言

邑中舊俗元宵爲燈節村人以棉花子碾碎拌油以紙包之其大如桃助以鼓樂燃放徧野十四夜爲神燈十五夜爲鬼燈十六夜爲人燈相傳神鬼收燈由來已久小徐郭村民張士安與其鄰侯秉元素相詼諧張士安於正月十五夜隨放燈者適野村人共見里北有一燈起空離地二三尺餘行甚速皆謂鬼收燈矣張士安恃其膽壯遂追之至前見侯秉元持碗收燈張士安問爾何爲者伊云持燈回家與小兒作戲耳二人遂大笑而散及張士安回家見侯秉元在巷口同婦女



看燈張士安問爾何回家之速侯秉元言并未出門且舉婦  
女以作證張士安遂愕然並述其故村人於是益信鬼收燈  
之說夫鬼因勢窮時迫卽能假託村人以逃鬼豈亦知明哲  
保身之道歟





